

Rosa College ta cumpli 150 Aña cu un festival pa e alumnonan

ORANJESTAD (AAN) - Aña 2013 ta nifica 150 aña di existencia di St. Rosa College situa banda di Misa San Francisco na Oranjestad.

Con St. Rosa College a cuminsa?

Prome cu aña 1816 no tabata tin ningun sorto di enseñansa na nos isla. Esei pa e simpel motibo cu nos no tabata tin maestro pa duna les. Ningun parti nos tabata haya scol unda muchanan por a haya un formacion adecua. Consecuencia di esaki ta cu tabata tin basta hende cu no tabata sa ni skirbi ni lesa. Nos no mester lubida cu e poblacion di Aruba e temponan ey no tabata asina grandi.

Den curso di tempo a bin cambio. Padernan, manera pader Serafin, aparte di eherce nan trabao pastoral, nan tabata duna les tambe. Nan tabata haci esei na nan cas. Mas tanto siña e muchanan lesa. E lesnan tabata wordo duna na Spaño. Varios di e padernan aki a bin for di Venezuela.

Na aña 1855 pader Paulus a pidi gobierno un pida tereno na Playa pa traha un scol catolico.

E scol lo duna les na Hulandes, ya cu a bin un maestro for di Hulanda. Pero e no a eherce su trabao pa hopi tempo ya cu na aña 1857 el a muri di un malesa contagioso. Atrobe no tabata tin maestro pa tene e scol.

E ora Monseigneur Niewindt a pidi yudansa na e soernan Franciscanessen di Roosendaal.

Nan tabata bisti na preto. Na juli 1857 e prome dos soernan a yega Aruba pa tene scol. Nan a traha te aña 1862 den e edificio cu pader Paulus a laga traha, ya cu den e mesun aña, malechornan a cende e lugar, cu tabata di palo y dak di rama di coco, na candela.

Na aña 1863, pastoor Te Riele a laga traha un scol nobo. Un scol mas grandi y cu dak di panchi.

Esey ta e parti mas bieu di Rosa College. Nan ta e dos lokaalnan banda pazuid di misa San Francisco na Playa. E "zusterschool" di mas bieu.

Na aña 1887 nan a bolbe hasi e scol un tiki mas grandi. Nan a traha 1 lokaal mas acerca.

E soernan paña preto (Franciscanessen) no a keda hopi.

Na aña 1909 nan a bandona Aruba y e soernan Dominicanessen di Voorschoten a tuma e scol over. Esakinan

tabata soernan cu tabata bisti paña blanco. Nan a biba prome den e landhuis Sividivi, cu despues a bira hospitaal San Pedro di Verona, te na aña 1920 tempo cu nan a muda pa Maria Convent, pariba di misa San Francisco.

Pa siña e muchanan lesa nan tabata usa buki pero pa siña skirbi nan tabata usa lei. Esaki pasobra ta un schrift so nan tabata haya pa aña. Den e tempo ey, e scol tabata tin den cada lokaal dos klas: 1° y 2° hunto, 3° y 4° hunto y 5° klas su so. Ora bo caba 5° klas bo ta tin cu bai cas pasobra no tabata tin mas scol. E muchanan tabata haya les di katisashi tur mainta. Nan tabata siña lesa, traha som y siña hulandes.

Na aña 1923 e soernan a reconstrui e edificio di scol cu ta keda pazuid di misa. Nan a hasi e scol mas grandi y el a haya e nomber di "Maria School". Tambe nan a construi e parti cu ta keda pariba di Maria Convent anto esey a haya e nomber di "Rosa School". Na honor di Santa Rosa di Lima a scohe e nomber aki.

E parti di pabao, Maria School, a bira e ora ey scol di paga y esun pariba, Rosa School, tabata scol di por nada.

Den añanan rond di 1940 nan a traha e edificio di scol banda di hospitaal bieu. Maria School

a muda pa e edificio nobo aki. E ora tur e compleho banda di misa a bira Rosa School, cual nomber a wordo cambia despues pa St. Rosa College. Te dia di awe e nomber aki ta existi ainda.

St. Rosa College, di awe, ta un scol cu ta conta cu 13 lokaal, 220 alumno, 12 maestro, cabesante y 1 guaiinterno. Actualmente St. Rosa College tin banda pabao 1° y 2° klas, prisma lokaal y lokaal di e guia interno. Banda pariba bo ta haya 3°, 4°, 5° y 6° klas. Tambe bo ta haya e oficina di e cabesante di scol cu ta Sra. Lai Ping Carti-Cheong.

Pa celebra e 150 aña di Rosa College (parti pabao), nan ta organisando un festival di canto pa e alumnonan. Esaki lo tuma lugar ariba dia 29 November 2013 na Centro di Bario Playa Pabao cuminando pa 7 or di anochi.

Cada klas lo wordo representa pa 1 alumno y lo canta un cantica na papiamento.

Acompañamento musi-



cal lo ta den man di Sr. Eric Rincones y musiconan di "De Trupialen".

Lo bai tin un cushina bon surti y refresco y juice na cantidad.

Asina ta, nos ta invita tur mayornan, ex-coleganan y ex-alumnonan pa asisti na nos grandioso festival di canto ariba 29 November 2013 pa 7or di anochi na Centro di

Bario Playa Pabao. Entrada por wordo cumpra na scol y tambe na porta dia di festival. Ban nos tur apoya nos alumnonan!